

PLANGINTZA 2021 martxo – uztaila

Azken Bizkarrezurrean eta herrialde batzarretan hitz egindakoak aintzat hartuz egokitutako plangintza da honakoa. Bizi dugun egoeran, litekeena da epeak eta datak aldatu behar izatea. Edozein kasutan, eraginkorra izan da panorama konplexu honi buruz elkarrekin hausnartzea eta zer egin nahi dugun adostea, ahal dugun neurrian eta egoerara egokitzuz, bidera dezagun.

Hamaika Gara ekimena urte amaierara arte luzatzea erabaki dugu, baina oraingoz, uda bitarteko plangintzari begiratuko diogu. **Mugarri eta erronka zehatzak** jarri ditugu gure taldeen ahalegina horietara bideratzeko eta gure inguruko jendea *misio* zehatzen inguruan berraktibatzeke. Datozen hilabetei begira, hiru helburu nagusi antzeman ditugu: 1) **ekimena ezagutzera ematen jarraitzea**; 2) gure taldeak indartuko dituzten eta sinadura bilketan aktibo izango ditugun **bidelagunak batzea** eta 3) inpaktu komunikatiboa baliatuz, gure **eragiteko gaitasuna biderkatzea**.



EZAGUTZERA EMATEKO:

- 'Altxa!' ekitaldiaren proiektioak eta aurkezpenak

'Altxa!' ekitaldia Hamaika Gara ekimenaren aurkezpen gisa baliatzeko material egokia da (www.gureesku.eus eta www.hamaikagara.eus webguneetan dago ikusgai). Urriak 31n zuzenean proiektioak egiteko asmoa genuen hamarnaka herritan, baina kasu gehienetan, bertan behera utzi behar izan genituen. Orduko asmoa berrartu, eta aukera ikusten dugunean, proiektioak antola genitzake, eta aurkezpen edo batzarrekin uztartu ala hauetara dei egiteko baliatu. Jakina, formatu txikian, aforoa mugatuz eta erabilgarri dauden espazioetan egiteko modua bilatu beharko genuke.

- Hamaika Gara solasaldiak (otsailtik ekainera)

Burujabetza eta erabakitzeke eskubidearen inguruko eztabaida elikatzea eta beste hainbat gai edo alorrekin izan lezaketen intersektionalitatea aztertzea dute helburu. Hamaika Gara ekimenaren sustatzaile diren Euskal Herri mailako eragileekin, sustatzaile izan gabe ere solasaldien antolakuntzan parte hartu nahi izan dutenekin eta Berria egunkariarekin elkarlanean antolatzen ari gara. Solasaldiak aurrez-aurre grabatzen ditugu eta online ikus daitezke, zuzenean, www.hamaikagara.eus eta www.berria.eus-en. Hamaika Gara-ren webgunean egitaraua kontsultatu eta saioak nahieran ikus daitezke.

EZAGUTZERA EMATEKO + BIDELAGUNAK BATZEKO:

- #11SinadurenErronka (martxotik aurrera)

“Sina ezazu, eta saia zaitetz beste 11 lagunuen sinadurak lortzen”. Jendeari transmititu behar diogu manifestua sinatu bakarrik ez, eta bere ingurukoek ere sina dezaten saiatzea proposatzen diogula. Katea ez dadila sinatzaileengan eten, izan daitezela beraiek ere beste jende batengana iristeko katebegi. Sinadura bilketa masibo izan dadin, ahalik eta jende gehien bilakatu beharko da, neurri handiago ala txikiagoan, sinadura biltzaile. #11SinadurenErronka, beraz, sare sozialetarako kanpaina bat izateaz gain, sinadura bilketan zabaldu beharko dugun filosofia edo egiteko modu bat ere izango da.

- Eskumuturrekoen lanketa (urte osoan zehar)

Eskumuturrekoak ez dira *merchandising* elementu hutsa; helburu bikoitza dute: ekimenaren finantziario iturri nagusietako bat izan beharko liriateke, eta era berean, kanpainak kalean presentzia irabazteke modu bat, sinatzaileok eskumuturrekoaren bidez gure atxikimendua eta konpromisoa erakusten baitugu. Honenbestez, *online* eskuratzeko aukera emateaz gain, ezinbestekoa izango da herrietan ere erosteko tokiak ahalbidetzea eta non eskura daitezkeen behar bezala komunikatzea. Era berean, Berria egunkariarekin batera eskuratu ahalko dira apirilaren 17-18 eta 24-25, eta maiatzaren 1-2ko asteburuetan.



- **Kanpaina eguna (apirilak 17-18)**

Orain arte ezin izan duguna egitera goaz: herriz-herri antolatuko gara asteburu berean kalea hartzeko eta sinadura bilketaren kanpaina egiteko. Herri bakoitzaren dimentsioen eta baldintzen arabera, ikusiko dugu zein den aukera bideragarri eta eraginkorra: batzuk mahaia jarriko dituzte auzoz auzo; beste batzuk, atez ate, buzoiz buzoiz edo atariz atari joango dira esku-orriak banatzen eta kartelak pegatzen. Herri bakoitzak bere modura egingo du; argi izan behar dugu nonbaitetik hasi beharra dagoela eta xumea iruditu dakigukeen ekintza hori ere martxan jartzeko abiapuntu egokia izan daitekeela. Ekintza honek bi helburu nagusi izango ditu: 1) sinadura bilketan aktibo izan litekeen jendea batzea, eta 2) ekimenaren berri ahalik eta herritar gehienei iristea.

* Apirilak 17-18ko asteburua pasata Bilboko mobilizaziora arte, hamaika asteburu izango ditugu. Zenbaki esanguratsua eta aitzakia polita izan liteke, adibidez, herrian txandak antolatuz, kalera mahaia ateratzeko edo bururatzen zaigun beste edozein ekintzatarako.

EZAGUTZERA EMATEKO + BIDE LAGUNAK BATZEKO + ERAGINA BIDERKATZEKO:



- **Dantzaren erronka (maiatzetik aurrera)**

Hamaika Gara abestiaren estribilloaren koreografia masibo bat dantzatzea izango da Bilboko mobilizazioko bereizgarri edo 'jokoa', eta nahi izanez gero, aurrekari bezala, maiatzak 22ko herri edo eskualdeetako mobilizazioetan ere egin dezakegu. Koreografia sinplea izango da, edonork dantzatzeko modukoa, baina era berean, izango du zerbait *challenge* edo erronka bilakatzea erraz lezakeena. Duplak eta Itziar Ituñok berak botako dute erronka, eta batik bat, Tik-Tok edo Instagram bezalako sare sozialen bidez jende gaztea aktibatzen asmoz planteatzen da. *Ituño efektuari* esker, bideoklipa mundu osoan zabaldu da; zergatik ez baliatu olatu hori eta erronka bota ia zenbat tokitan dantzatzen dugun Hamaika Gara? Izan litezke urrutiko lekuak ala Euskal Herrian bertan, toki bitxiak. Eskumuturrekoa dantzarako ia ezinbesteko elementu bilakatzen saiatuko gara.



- **Herri edo eskualdeetan mobilizazio eguna (maiatzak 22)**

Herri edo eskualde mailako mobilizazio edo ekintza egun bat antolatuko dugu. Ekimena ezagutzera emateko, jendea aktibatzen, sinadurak biltzeko eta uztailleko mobilizaziorako lanketa egiteko baliatuko dugu. Uztailan Bilboko Areatzan egingo dugun mobilizaziora keinua eginez, ibai ingurua baliatzeko aukera proposatzen dugu, betiere, ibaiak herriaren erdigunea zeharkatzen duen herrietan.



- **Mobilizazioa Bilboko Areatzan (uztailak 3)**

Kale okupazio bat izango da, Bilboko Areatza inguruan, Arriaga eta udaletxeko zubiak eta batetik besterako pasealekuak hartuz. Ekitaldi politiko-kultural bat egingo dugu, eta dantzaren erronka bertara ere eramango dugu, Dupla eta Itziar Ituñorekin batera. Beste hainbat kultur gilek ere parte hartuko dute, ibaia eszenatoki bezala baliatuz. Egoeraren baitan egokituko dugu jende kopurua, aforoa zabaldu edo mugatuz.

- **Kataluniarrekin elkarlanean ekintza Pirinioetan (uztailak 10)**

Datorren urteko udan euskal herritarrok eta katalanak Pirinioetako hainbat gailurretara igo eta bi herriak batuko dituzten argi-kateak osatuko ditugu. ANC, Omnium Cultural, FEEC Kataluniako Mendi Federazioa eta Llum i Llibertat-ekin elkarlanean antolatuko dugu mobilizazio erraldoia. Indarrak batuko ditugu eta auzi territorialak nazioarteko testuinguruan eta politikoki bideratu behar direla aldarrikatuko dugu lau haizetara. Mobilizazioa antolatzeko denbora gehiago beharko dugula baloratuz eta datorren urtean askoz egoera hobean egongo garela, 2022an egitea erabaki dugu. Edonola ere, elkarlanean urratsak egiten hasteko borondateak bultzatuta, ekintza sinboliko bat egingo dugu Euskal Herriko eta Kataluniako mendi bana argizatuz, elkarrekin egingo dugun bidea argizatzen hasi eta datorren urtekoa iragartze aldera.

